

四庫全書

集部

欽定四庫全書

集部

宋百家詩存卷三十四

詳校官監察御史<sub>臣</sub>孫家賢

主事銜<sub>臣</sub>徐以坤覆勘

總校官庶吉士<sub>臣</sub>倉聖脉

校對官中書<sub>臣</sub>李 荃

謄錄監生<sub>臣</sub>孫 炯

欽定四庫全書

宋百家詩存卷三十四

嘉善曹庭棟編

吾竹小藁

毛珣字元白柯山人豪於詩有聲端平閒吾竹小藁一卷寶祐六年荷澤李鼎弁序云柯山元白詩人之秀者也通今達古著蔡後生采詩家得其一二如寶肆中犀璧混於螺貝惜其以文自晦不求於時吟藁

一帙章不盈百清深雅正蹟前事而寫芳襟奚止嘲  
風弄月已哉

送客遊吳

水鄉秋易冷珍重過吳淞在旅雖難遣於詩莫厭攻一  
輪僧寺月半夜客船鐘況有賢州牧知音是舊逢

小至

天地陽初動披衣起擁爐門前初去馬窗外漸啼烏雲  
色呈金未梅梢破玉無焚香待天曉點易自研硃

廬山棲賢寺

名重於諸刹前賢舊隱踪無人知有路隔樹忽聞鐘瀑  
壯山疑裂雲深寺若封或傳遺藁在三扣昔時松

登黃岡清淮門

風吹蘆葉江頭路江水江天共秋暮邊淮寒蚤客行稀  
只有征鴻向南去征鴻自去書不來遠衣未寄憑誰催  
孤城慘咽暮笳起城下荒榛接淮水

種竹

山居無力塵居俗有客勸予惟種竹種成貧家可驟富  
翠色琅玕遶君屋清晨荷鋤斷溪岸分得溪光入城綠  
暮年百事課功遲坐待春風滿林玉

墨龍

真人尸居雷八荒斷磚殘墨生蒼茫鯢桓下賤九淵黑  
神光倒射角與亢平聲明明元氣淋漓蹟水底焚槐海波  
赤周流萬化元無極姑使人心識天則

湘江

湘江誰道無情水  
寶瑟聲寒愁帝子  
安知日月在中天  
萬古重瞳元不死  
楚南楚北千里雲  
持香遙禮雲中君  
莫起悲風助騷怨  
蘭枯菊瘁不堪聞

東風

東風煦嫗如慈乳  
欲報生成恨無所  
自拈花片作斑衣  
起捧香醪勸春舉  
傍人笑我老如許  
我亦笑渠將及汝  
梅花也笑柳都舞  
君如不飲出童叟

富川邂逅戚叔聞

百蟲𦏧蟄鴈奔忙君從何來兩袂霜大冠如箕盍齊魯  
此地無乃驚吠厖釣竿曾笑江河窄尺水無容投轄客  
取羝為君向東較一聲裂石扶桑白

邊月

人言月裏仙人住隱躍娑羅樹根兔玄霜擣就亦多年  
不見有人曾得渡清光遍照邊城秋城邊白骨胎王侯  
王侯白骨卒未已龜蚪吸月獨不死

富池廟



船頭蜀錦三千尺倒影長虹浸寒碧相逢不是紫髯郎  
鸚鵡洲邊眼生棘江頭簫鼓雜雜靈鴉人道陰兵曾護國  
安知樓下雪千堆不是吞曹氣衝激

浙江

白鵬舊事隨波去太極陰陽自吞吐長虹夜貫黑頭船  
四紀沙迎相公路馮夷作劇真等閒五都有客雄其間  
上林三官浪憂國千年海底生銅山

檜瀑

媧皇失補天南角一道銀河落君屋又疑元氣自周流  
不然瀉盡誰能續瀑邊老檜尤可人髯疎骨瘳皮鱗皴  
崩崖欲壓全不懼夜半潛蛟暗來去

虎丘

阿鴻血染吳苔碧氣徹重泉埋不得千年至寶復歸天  
顛倒海中飛霹靂至今荒怪列虞初鑄石千尋駭遊客  
寺邊別廟是何神月黑伽藍問周易

丹陽館

渡江第一南來驛幾度華堂延鴈客百年運逐曉雲空  
愁殺鞦官老無職南徐今日古陽關不斷歌聲祖離席  
國讎已復事尤多折損年年春柳碧

秋日即事

黃花曝日香欲醉黃蜂抱香暖欲睡老夫邂逅亦欣然  
一段先天畫前意喧喧歸雀聒叢篁夕風欲轉明朝霜  
花搖蜂醒我亦覺斜陽一片秋茫茫

甲午江行

百川無敵大江流不與人間洗舊讎殘壘自緣他國廢  
諸公空負百年憂邊寒戰馬全裝鐵波闊征船半起樓  
一舉盡收關洛舊不知消得幾分愁

寓興國之十詠亭呈諸友

斷垣荒棘疑無路忽有幽亭一畝餘不稱郡侯來挹酒  
偏宜野客借觀書臨堦汲水防苔滑隔岸看山愛柳疎  
非有舊交時下顧十分風味落樵漁

寓泉之安溪

已恨逢人語不通更堪煙嶺隔千重山城縱是如花好  
海霧終愁似墨濃遠信斷無鴻可寄故鄉惟有月相逢  
閒於荔綠蕉紅處步屨時留到晚鐘

雪

無雨無雲曉色乾忽驚瑰壁滿檐端不教聲到窗前覺  
應恐愁添屋下寒占瑞農官尋玉尺析醒公子索金盤  
柴門睡起無多事卷上疎簾帶竹看

關心

關心歲月似驚波  
少日無成奈老何  
別久帝京知事少  
住長客舍識人多  
典衣沽酒杯難滿  
借壁題詩字易磨  
蚤信出門無遇合  
故山只合守樵柯

鳳凰臺

江山依舊昔人非  
多少興亡問不知  
鴈去又逢重到日  
鳳歸安得再來時  
風吹木葉隨漁艇  
霜壓蘆花出酒旗  
特地待吟吟未得  
數聲昏笛戍樓吹

學道

學道先須學忍貧  
緼袍蔬食當華珍  
摳衣所欠參前輩  
開卷猶欣見古人  
暗坐雨窗心似月  
冷眠雪屋氣如春  
向來酷意耽吟事  
今亦相忘越與秦

贈碧蜍

鳶飛魚躍兩悠悠  
造物何心莫問休  
但得一杯長在手  
不須萬戶更封侯  
人間有夢何非蝶  
物外忘機即是鷗  
我亦青鞵行腳者  
會摩銅狄話重遊

和張海深

幾踏槐花角寸長擔簦羞作老來忙立身蚤慕千層塔  
閱世今知百戲場從辟穀來惟嗜酒自我梅後不燒香  
人生底為青衫急亦有秋荷可製裳

我策曾無一策長一生蟻踏歷間忙持經佛寺新投社  
寄食田家舊藥場古劍放教龍逐伴殘書分與蠹餐香  
不愁死去無名在化作千年老鶴裳

古出塞

初說成漁陽戢傳出定襄朝朝征馬過春草不曾長



山月

山月共徘徊山泉酌一杯詩成無筆寫畫石記蒼苔

書墨竹六言

伯夷有風世契子猷結千古交煙外三葉五葉雨中一  
梢兩梢

海陵之堡城三首

四面蒹葭水接天中間一片是人煙相逢盡喜干戈息  
白鷺飛來立戰船

傍城三十里芙蕖怪底繁華浙景無元是近邊農事少  
全憑蓮藕當官租

邊聲籍籍蚤秋風稻米黃時棗又紅莫厭水鄉遷避苦  
全家載入綠荷中

儀真

販來北棗堪充膳種得西瓜可析醒總是中原舊風物  
不堪今日是邊城

晚涼

窗前灑地著胡牀  
浴罷閒來坐晚涼  
更取壁燈移暗處  
待他月上竹邊牆

南山有梅花

南山有梅花高者五丈餘  
半空發清香天人為踟躕  
城中三尺本登盆綴流蘇  
進之畫堂上笑彼何麤疎

山中吟七首

幽幽山上松泠泠松下井  
白石當銀牀青蘿作修綆  
山翁獨酌餘無客可堪評  
葛洪分煉丹陸羽求煎茗

采薇作庭實紉蘭作筐篚持以薦王公謂可蘋藻比王  
公齟齬謝王門何用此問客姓與名或是孤竹子

山中夜讀書山鬼來相試隔窗問疑難頗及堯舜事予  
非卯金人安能動星緯劃然一推窗餘音在空翠

山翁不能文亦免時流笑蚤愛滄浪歌知詞不知調長  
年山水閒所業只耕釣偶得千齡龜遂通八卦兆

山花開滿枝山鳥啼無時君胡欲棄此自取塵汙為山  
猿躡君履山鹿銜君衣挽君君不留去去君何歸

解葉可以衣松實可療飢騎鹿下山去儼說高人知高  
人不可得紛紛卻語誰晚窗白雲過且自相同歸  
題牋寄親友蚤蚤山中來紫芝既可采蟠桃行當開持  
書託南風北風復吹回愛之不可見落日令人哀

湓江

遠樹一重重煙邨與市通難尋元亮宅遥酌菊花叢蜀  
浪帆檣外廬山几席中何時邊事息來此作漁翁

已酉客淮

烽燧春尤急人才歎寂寥恨無黃石畧難致碧幢招守  
塹宵仍甲防城曉未橋又傳經一雪殘哨亦蕭蕭

送田耕月遊吳

衣笈詩囊外身輕費亦輕不妨船眼窄時上岸頭行橋  
里逢霜信松江問水城吳中聞歲稔新糴想須平  
登橋仍問渡迢遞到吳中僮僕挑茶竈移船避釣筒月  
生林屋洞潮接館娃宮得句人傳去蘇牋價亦穹

此去姑蘇郡都無五日程仍聞新太守最重舊交情有

句梅邊索無田月下耕雙親方待養我亦勉君行

吳門田家

到處車聲轉水勞東鄉人事獨逍遙一隄灩灩元非雨  
總是吳江淡水潮

邛邛鼓笛樂秋成露未凝霜水未冰無賴酒家偏角利  
隔年蚤挂上元燈

田家少婦最風流白角冠兒皂蓋頭笑問傍人披得稱  
已遮日色又遮羞

長襟侈袖若僧衣  
閑蕩扁舟入郭嬉  
好是醉歸邨舍晚  
聲聲耳畔好郎兒

宿廣果寺

寺門初掩夜沈沈  
風逼寒燈檜影深  
滿屋異香僧入懺  
一甌新茗客按吟  
雲歸古殿聞龍氣  
月照空池見佛心  
坐久卻眠眠未穩  
屋頭鐘起鵲驚林

數椽

梅有清香竹有陰  
數椽於此寄幽深  
舊看飛鴈拋孤旅



新聽啼蛩悔苦吟幾卷書皆先世蹟一張琴是古人心  
柴門未必無知己何必江湖在遠尋

陳藏一山房

一室焚香即太初萬人如海儘從渠第於心上曾無著  
何必山中始可居垂箔護花嫌引蝶連筒汲井怕生魚  
草元政不妨人事問字敲門未可疎

元日寓越之三江

客裏元正最可憐就他香案禮蒼天嬾拈著草占新歲

頻對菱花憶去年，僅有邱翁分席拜。  
不如野老著衣鮮，百年草草渾如此。  
且醉殘梅了目前。

滄浪亭

濯纓人去水空寒，事屬明時欲問難。  
日暮客歸園館閉，

鷺鷥飛上石碁盤。

子美故物  
惟石枰存

石湖

一片湖光接薜蘿，功名餘事屬吟多。  
至今魚鳥皆堪敬，曾見烏巾照碧波。

雪坡小藁

羅與之字與甫一字北涯螺川人端平閒累舉不第  
遂歸隱賦詩云古來至寶多橫道何事荆山泣卞和  
亦自寫其不平也晚年潛心性命之學嘗作譚道衛  
生詩詩皆閱歷後見道語雪坡小藁二卷劉後邨有  
題句云纖千機錦非常巧熏一鉢香已覺多可謂極  
意稱賞矣

短歌行

金谷桃李叢畚插費培植寒冰猶未泮花葉已嶷嶷貞  
松生南山石老厥土瘠春回氣尚淺生意幾欲息東皇  
本無私花根異形色曾謂天地功不及糞土力

寄衣曲

憶郎赴邊城幾箇秋砧月若無鴻鴈飛生離即死別  
愁腸結欲斷邊衣猶未成寒窗剪刀落疑是劍環聲  
此身儻長在敢恨歸無日但願郎防邊似妾縫衣密

東擔

東擔出荆扉，征塵染敝衣。  
人憐雙鬢改，我悟半生非。  
抱璞今誰訴，知音古亦希。  
尋思無一可，吾道欲安歸。

旅思

荏苒秋光老，空濛晚色奇。  
霜嚴雀語澀，風定鴈飛遲。  
旅思荒煙底，鄉心野水涯。  
夢歸歸未得，愁極祇顰眉。

玉梁道中雜咏

一別三會峯，轉矚閱半紀。  
山根石上苔已沒，舊屐齒摩  
孳。青青松彼樹，猶如此。睠言枕清流，為洗囂塵耳。

清商從西來刺刺滿林塢草木倏變衰柯葉不相顧昔  
時翳空雲今作連山雨菊花猶強項籬邊爭媚嫵

峭壁圍莽蒼荒谿人削迹時聞蘆葦叢野鳥語岑寂浮  
生雖有涯幽討當無極御風獨長嘯此心謝鞿轡

曉霜媒薄寒崑壑失故綠輕飈振槁葉唱徹陽關曲秋  
光何足憐嗟此歲事促愁吟思無聊日沒西山麓

乾坤埽陰霾晴色蔽幽谷山川薦秋容可繡若可擗千  
品寄一筇萬里付雙目行行翠煙中日與清景逐

塵坐不可奈飄然入林垌稍覺道心勝漸至詩脾清靜  
極生孤愁耿耿難為情喧寂雨莫愜吾意何由平

春殘

林端啼鳩損年芳洞口空憐野水香人與落英兼寂寞  
蝶隨飛絮兩彷徨不因花事榮枯易未覺春工代謝忙  
卻愛曉來風日映綠陰千丈漾橫塘

登上筍山役龍洞

捫蘿入幽谷眼界益崢嶸石壁斷人跡泉流閒鳥鳴日

高雲未散秋晚草猶榮坐久無歸意悠然世念輕

始見

雪後寒猶勁書窗怯暫開因沾江畔酒始見竹閒梅歲  
月崢嶸去衰顏次第來誰能憂許事杖履且徘徊

山行

狂飈卷雨辨朝曦似與新時有會期秋水秋山秋草木  
渾將乞與數篇詩

煙草淒迷露未晞一筇伴我立晴暉丹楓雖老猶多態



散作漫山野蝶飛

片雲輕度半巖陰  
屢俄驚翠靄深澗底寒泉知予嬾  
石根漈漈自長吟

盡日留連興未闌  
寒鴉背負夕陽還  
遙知今夜空窗夢  
只在江南水石閒

寄玉蜀蕭高士

滴露騰真誥蕭然莫與羣  
新詞清似月世念薄於雲  
俗去堪憐我閑眠極羨君  
惟餘綠綺韻惆悵未曾聞

桂花爛漫一夕敗於風雨呼僮埽落英以供香  
事戲作古句

小山涼風高秋氣遶庭砌江南山水秀鍾此數叢桂亭  
亭蒼虬蟠磊磊粟玉綴熏染風露香擺脫脂粉媚芙蓉  
已無秋籬菊極羞媿幽芳蕙百畝香味亦瑣細孰知標  
格奇自取造物忌狂風挾怪雨族滅無噍類纔憐金作  
屋俄驚粟布地姿容就枯槁氣骨尚奇異如彼死諸葛  
凜凜有生意試炷博山火來參煙一燧

客行

客行困泥潦山堠不勝長  
就使雨點暴更令風力狂  
時危嫌店遠日暮覺程忙  
身世摧頽甚艱難已備嘗

山居閒思

雲散山月吐星稀  
山月高相羊風露底  
望月誦離騷

夏雨

飄忽回風起差池高鳥翔  
雲呈千嶺碧雨獻一天涼  
飽意歸田畝歡悰入醉鄉  
忽思素秋氣蕭瑟滿空堂

中秋步月

林間一葉秋屏去三伏暑淒然風露繁締綌莫能禦炎  
涼相推移何為遽如許孰知秋已半今夕四十五

幽人披襟來步此一庭月如渡滹沱水似泛山陰雪誰  
將羌管急閒彼鄰杵切冉冉秋思生令人欲愁絕

空山本無塵況復值良夜風清月色佳圭璧不當價徐  
行苔徑閒小立林影下飄飄意欲仙舉手人世謝

景物與意會掀髯聲悲鳴一語得總持萬狀就使令以

我詩思苦賞此秋月明今夕月明裏幾人同此情

姑蘇道中

滿眼菰蒲翠撲衣雙雙沙鳥漾斜暉閑愁一段如冰釋  
楊柳叢中出酒旗

信步

信步獨幽尋春山野霧深鳥啼如喚僕泉響似鳴琴日  
暖草爭秀風狂花不禁卻嫌荒僻地無酒與春斟

泛舟秋懷

白露消磨暑丹楓點畫秋閒吟小山賦歸思大江流世  
盡營三窟人誰樂一丘蓬窗有佳致月朗政風休

山行愁思

日落煙欲橫山寒翠將滴荒邨渺愁人跬步觸四塞路  
遙兩髀酸頗恨身不翼舍策還悵然倦倚松下石

明月印野水暮色進旅愁僕痛主亦疲心口相怨尤茅  
舍劣容膝弛擔聊小休會當理歸策甘彼窮山囚

夜宿郁木福地徜徉明月閒遐想仙風得二十

八字

淒涼風露濕人衣  
猶自踟躕未忍歸  
樹影忽來山月轉  
悞驚鶴翅似輪飛

閒居遣懷

日暮掩松關  
悠然謝往還  
停杯因待月  
徙倚為看山  
貧  
悟道中樂  
醉偷忙裏閒  
耳根偏可意  
風澗響潺湲

臨流

習習涼颼起  
素波臨流解  
帶小婆娑  
秋光已共蘆花老

夜雨那勝落葉多不覺儒酸同糾纏極知妄想盡銷磨  
笈中班史猶堪質官作商聲寧戚歌

為言

日薄寒濃春意微花鬚柳眼尚依稀為言羯鼓休頻打  
催得先開即蚤飛

秋林

秋晏元雲替積陰平蕪氣象極蕭森細看搖落風霜意  
已見發生天地心畢竟栽傾非外致豈伊培覆自相尋



若教宋玉曾聞道九辨悲思未遽深

長至書意

萬草千花若死灰陽和一氣已潛回莫言舉世無先覺  
幾處寒梢放野梅

花下歎

人生何處較窮通天意元難測始終花落花開翻覆手  
君看同此一春風

林深

林深氛雜不相關衆建芳馨兩廡閒月榭琴彈新製曲  
曉窗晝展舊遊山淒涼風滿竹千个的爍春歸梅一班  
可笑野人無繫累機心猶在釣魚灣

纔是

忍看繁紅委路塵空餘野草綠無垠人生憂樂何終極  
纔是迎春又送春

寄遠詞

寒梢蕭索風振林蟬蛄切切語欲噤終宵展轉不能寐

遙憶良人戰場裏陽關一別歸無期翠煙幾度秋螢飛  
當時手種合歡樹今已蒼蒼雲四垂蜀錦裁書憑鴈寄  
那能道人意中事深秋儻得未移軍猶見幽閨數痕淚  
居延城外刁斗聲無定河邊霜月明妾身雖老幸未死  
何日中原賀太平

被酒

人間笑口信難開十事嘗嗟九不諧忙裏始知閑氣味  
老來方見少情懷清商撩慄歲無幾玄髮蕭疎生有涯

誰謂伯倫聞見滅卻甘麴檠自沈埋

黃鶴樓

翬飛棟宇據城端車馬塵中得異觀  
雙眼莫供淮地闊一江不盡蜀波寒  
老仙橫笛月亭午騷客懷鄉日欲殘  
獨撫遺蹤增慨慕徘徊不忍下層欄

瀟湘道中

客行適瀟湘淒其歲云晏枯梢風騷牢  
荒郊雲漶漫槭槭雨聲急皚皚雪花燦  
紆紫泥途深渺默山堠遠日暮

欲稅駕天末叩孤館米盡甌生塵薪濕火不煖此意對  
三閭似結兩重案人生如空華百歲等抹電那忍聽客  
塵日夜苦相煎懷安名所敗飽食親孰顯恭承古昔訓  
險阻安敢憚信知有此身乃是一大患愁深不能寐歌  
長未及亂門前車鐸鳴翰音復號旦

看葉

紅紫飄零草不芳始宜攜杖向池塘看花應不如看葉  
綠影扶疎意味長

虎溪

衝飈吹客襟飄拂虎溪渡遠想三笑時此意固有寓孰  
知祕密藏奚聞笑默語繩繩徹上下綿綿貫今古東林  
鐘聲幽康廬山色嫵是皆善知識長時相警悟世人自  
合塵兩耳聾莫覩百千微妙義墮在一毫許我行發深  
省如重睡忽寤向人欲舉似有舌不能吐

倦倚

蟬聲燕語細相和池面纔浮點點荷倦倚闌干消永日

葡萄陰薄柳風多

雲泉詩集

僻嶠字仲止號雲泉世家永嘉之廉邨負才不遇以  
詩聞於時所居曰漁邨有漁邨名自我之句題詠頗  
多晚年買山范灣營藏地有詩云不知筋力何年盡  
看到松杉幾尺長佳句也淳祐己酉東閣趙汝回序  
其詩謂僻君詩本唐體而物與理稱更成一家其人  
瀟散之際自有繩尺恬靜不求本於天性未易以矯

孫學者

山中吟

疎拙本天性束書歸舊林世人皆失笑泉石自知心  
山柿紅猶澀池魚靜亦沈於中觀物意吾道樂彌深

題扶疎亭竹

風晴雨雪天無趣不蕭然影過鄰家月根通石下泉  
長因終日看憶得故山眠物性今方會心虛節自堅

歲暮書懷



園林春又近老態更無歡添歲兒童喜照貧燈火寒直  
心嗟道喪多事識才難已種梅千樹從今爛漫看

賦中上人頑坐

取貫休覓句  
如頑坐句

嗜吟忘夜凍立雪此同機工苦精靈聚毫端造化歸石  
牀趺半結荒徑葉頻飛客至應相訝無心聽扣扉

旅中秋夜

車馬日西東阮生途自窮三年辭舊國今日又秋風邊  
鴈淒涼過池花寂寞紅邦人慣相識漸覺語音通

送劉荆山

束書入京闕憂國最情深天意有興廢人才無古今布  
衣萬言疏孤劍一生心直道嗟難遇賈生終陸沈

古澹師然公遊方

野僧攜錫別何處度殘春天地無窮事江湖自在身真  
心齊得物道貌異於人昔日安禪地深山虎亦馴

天育道中

除將吟卷外琴與鶴相隨問寺路猶遠入山深未知鳥

靈巢佛塔猿飲挂藤枝陵谷幾遷變道旁橫古碑

育王寺

寺在衆山裏白雲深更深不知行樂意何似坐禪心護  
塔龍常在倚松僧獨吟渡江前賜字珍重到於今

太白山觀雪

二十里松聲千山雪未晴人當絕頂見吟到此時清大  
地球琳滿空林鳥雀驚老僧觀物化無滅亦無生

天童寺

佛界似仙居樓臺出翠微浙江山水最海內衲僧歸草  
樹有真意禽魚盡息機禪房無別事惟見白雲飛

送潘道士

春渚微茫碧草連千花飛盡柳飛綿孤雲野鶴生遐思  
明月清風共一船披褐還尋棲隱地空囊惟乞送行篇  
先生自有修真訣不倚丹砂駐少年

過邨翁家

白髮茅茨下耰鉏力未衰兒孫收滯穗雞犬入寒籬俗

樸人家善山深井稅遲能言者舊事相問坐移時

群野鶴

瘠形如鶴頭如雪流浪江湖歲月深但是胸中有丘壑  
何分城市與山林

開爐節

閒身何所似丈室老維摩茅屋地爐小荒園樹葉多移  
窗就梅影臘草補漁蓑似此寧辭苦邊寒尚枕戈

除夜苦雨

華髮負滄洲星霜又一周未憑終夜雨能洗隔年愁池  
草起吟思樹禽棲屋頭空餘壯心在燈下看吳鉤

呈楮溪主人

一水旁通四五池竹亭茅榭亦相宜中間更著高人住  
不到溪山無好詩

寄公衮舍弟

每恨世交薄相期情最深秋風一回首明月兩關心鶴  
病難為藥砂頑不化金余生百計拙耐可事清吟

新築湖外草閣

揮手紅塵我老矣，斷隄流水草堂新。  
幾年荆棘無行路，一日雲山有主人。  
未許園丁知姓字，先從漁父問仁鄰。  
謝池鷗鷺煙光裏，飛去飛來伴隱淪。

山居簡飲水友清溪槐逕二弟

別後全無夢，寄書安得頻。  
誰憐獨住意，天棄苦吟人。  
債長新年息，貧欺漸老身。  
入林知未密，猶與俗相親。

送友人之括蒼

石門當半道想見泊舟時伴鶴立終日就宮題幾詩近  
山秋易老問隱地偏宜我亦江湖去心期得爾知

為張上翁賦松友

之人梅竹操抱此歲寒心古道久不作高風獨在今無  
言欣意會肥遯愛山深我亦蕭閒者從君澗壑吟

友人入京

猿鶴亦悲鳴家山莫浪輕千峯帶秋色一路獨吟情野  
水衝潮白孤雲趁月行遙憐歸夢斷七十二灘聲



秋試下第有感

焦桐何處是知音猶向殘編惜寸陰此日便為終隱計  
青山已負十年心梅花獨對寒流潔野鳥高飛古木深  
萬古紅塵徒擾擾幾人頭上有朝簪

哭薛元善兄弟

寂寞一窗燈隨風滅又明空堂連夜雨白髮哭兒聲樹  
色悲搖落交情隔死生惟應骨肉愛為鬼亦同行

送松風僧淵中二公遊方

無累雲相似悠悠天地閒  
新秋生遠思此去未應還  
撼錫驚棲鶴聽松思故山  
吟詩與說法同是一機關

漁邨晚照

舊遊憶得瀟湘路今喜煙波似舊時  
澤畔怕逢漁父問桃源已被世人知  
數家草市添新戶一樹寒鴉傍古祠  
蘭杜香深洲渚闊小窗長日賦騷辭

蓑衣步

水浸石根冷風吹藤葉飛  
菰蒲秋影裏長趁釣船歸

寄宋希仁兄弟

咫尺不相見，閉門惟苦吟。  
聽殘寒夜雨，灰盡壯年心。  
身外一貧在，燈前百慮深。  
所欣交友義，白首亦如今。

題中川張氏居

鷗鳥往來處，此翁甘隱淪。  
地因人物著名，入郡圖新夜。  
月情懷澹茅茨，意態真高風。  
無識拔老卻，采薇身。

和鴈來紅

若將羣卉分高下，此種無因到畫欄。  
寒蝶不知紅是葉，

飛來猶作野花看

雲壁上人遊方歸

亦是無心出不知歸意閑  
一身隨鐵錫十載住金山  
定石霑花雨清齋帶病顏  
常云迷覺路只在片言間

黃蜀葵

嬌黃無力趁芳菲  
待得秋風落葉飛  
空有丹心能就日  
年年憔悴對斜暉

贈漁者

幾度看山愧白鷗身名心事兩悠悠何如醉醒寒江上  
風卷蘆花雪滿頭

真隱寺呈延上人

塔光圓照室香炷讀經晨林下有清福塵中無悟人巖  
陰常候雨松色不知春青草何年墓標題界碣新

茅屋

茅舍竹椽短不勞朱堊施高無神鬼瞰貧與子孫宜近  
古意全樸當風勢亦危梅花有幽致一樹隔疎籬

秋夜宋希仁同吟松風閣有感

相逢長日坐如癡  
癡得吟肩聳過頤  
天意復生郊島在  
人生自逐古今移  
高秋月色行松頂  
半夜山中讀楚辭  
此道若非千載後  
塵昏何處照妍媸

冬日雜言

茅簷日出勝重裘  
飽飯看山倦即休  
識得箇中真氣味  
自然無夢到封侯

鶴唳柴門月過牆  
梅花如雪滿林香  
風光直許閒人占

不耐閒人夜亦忙

布被烘來煖似湯  
蒙頭高卧未昏黃  
道人不是貪鼾睡  
省事門中第一方

鴈山紀遊

壽昌寺

野服挂僧單  
禪扉月未闌  
桂香清近佛  
秋色老依山  
目盡遙峯出  
步回流水閒  
相傳登蕩路  
數處可躋攀

能仁寺

過盡盤山險，登臨意忽平。  
殿燈搖佛影，瀑布雜鍾聲。  
湫闊龍居頂，路回峯換名。  
曉行林日薄，海氣接雲生。

靈巖寺

千巖稜骨露，隨怪各生形。  
目力到天盡，心旌倚佛寧。  
夜鍾傳谷杳，石氣逼燈青。  
崖腹獼猴住，多年性亦靈。

淨明寺

入寺嫌僧俗，獨行松徑幽。  
夜扉崖室寂，齋磬鐵盂秋。  
谷棧雲迷級，石溪霜迸流。  
維摩不語坐，何日病能瘳。



趙東閣倅越

百指忍貧需遠次壯心銷盡鬢絲知身如韋素居常泰  
官被聲名折得遲東擔喜聞千里戍出山惟有十年詩  
蘭亭風月應須記人物依稀似晉時

賦王九山滄浪閣

千年孺子吟誰會此時心方寸有涇渭煙波無古今水  
禽知雨候山氣愛秋深不盡憑欄意橈歌歸故林

旅店蚤起

半醒夢猶在擁衾無限情曉窗燈影澹山路雪吟清歲暮羨歸客囊空嫌去程故書多廢理驚媿動心旌

為迪上人賦寒猗

山僧愛修竹種此出囂塵霜雪不知苦歲時長自春定回閑坐石風過動吟身儻欲求歸止清虛即道真

新春感懷

新種黃精助晚糧生涯小小拙何妨春風吹鬢不重綠白日笑人長自忙

閒居雜興

亦有入城路門前秋草長荷鋤書在手負鋤醉為鄉雲  
渡溪流澀廚煙樹葉香為貧從儉約猶欠半年糧

鐵硯幾磨研依然螢雪邊薄才遺聖世無祿盡親年多  
病惟諳藥當寒不識綿素心期澹泊冰檠誓能堅

閉戶謝流俗青山獨自看澹交從古少冷面對人難農  
圃元非學神仙不在丹孤懷無別想回向此心觀

土木非吾事支東復拄西雨盈溝壅葉簷側礎沈泥護

壁時編葦登樓恐折梯若無別擾至終歲亦安棲  
近覺吟無趣權將俗累刪鶯花老眼倦風雨半春閒野  
服便麤褐柴扉掩暮山片雲尋處泊飛度竹簷間

白髮天應棄春風吹不青神仙歸恍惚書傳出英靈周  
粟豈醫餓湘流難活醒迄今名字在百世仰芳馨

潘懷古參學

同吟四十過三四常恨詩銜欠一官人事中年多感慨  
仕途今日更艱難爐亭圍坐推前輩夜店單牀定薄寒

最喜親庭住闕近盡攜兒女入長安

蚤起即事

隔水鍾聲枕上聞城中人事已紛紛開門放鶴溪邊去  
衝破閑堦一片雲

林景雲參學

一門四世同堂樂門外傳呼釋褐歸自此高車訪遊舊  
屏將阿從叩漁扉三冬晴暖春寒在千里詩書野意遑  
又說攜琴按逸譜休嫌古調按今徽

郭氏抗雲樓

宴坐羣峯表太空無一塵青山獨徃意白首自由身放  
鶴重霄闊憑欄萬木春紛紛荆棘裏跬步亦逡巡

重遊鴈山

龍鼻井

怪極生真想饑凶禱請勤半身鱗甲具一勺渺瀰分應  
谷聲如鬼飛空石礙雲精誠隨寓在亦以感通聞

天聰洞

天聽本非耳形容獨費吟豈伊穿鑿力能探杳冥心混  
沌開中竅空虛納衆音下臨千仞險當暑骨毛森

照膽潭

彼我俱澄澈中涵理趣深遊鯨具龍體幽洞達潭心影  
動猿搖樹沙明日耀金片巖經霹靂痕鑿到於今

五老峯

巖前看不足化此石為身憶昔白頭者於中第幾人相  
逢應失笑久立豈迷津勿厭薛蘿密癡容免俗瞋

哭陳瓢飲

每恨去城遠番番語別難  
論交置疏數盡醉就團圞  
事往遽成感松彫不待寒  
尚餘親翰墨收淚再三看

漁邨雜句

莫論塵土與煙霞收拾襟懷  
即我家絮帽蒙頭霜月下  
水邨深夜看梅花

三五人家住一灣近城無路  
去來難溪邊自結同吟友  
松柏青青到歲寒



野水微茫路欲迷  
重重沙渚自高低  
鷺鷥飛過無心泊  
直入殘陽樹杪棲

猿鶴何曾肯受羈  
偶來亭畔立多時  
物情未到忘機地  
步步行行只自疑

月海遠上人遊方過靈隱

一點靈光在月生  
滄海深此中難著語  
何處可相尋  
野寺齋無定  
窮冬日易陰  
聽松行九里  
卻坐冷泉吟

感興

簞瓢吾道在此樂語人難遺卻形骸累始知天地寬遠  
山不辨樹高屋易生寒數夜雪風急編蘆壁未完

春晴泛湖

平湖新漲綠沙觜淨涵波芳草思無際春風情最多移  
舟動山影止樂聽漁歌得意惟鴻鵠高飛避網羅

呈井南劉主簿

何處井南居青山遶屋廬竹生從礙路泉響不驚魚有  
道貌亦古澹交情似疎慈親更彌壽堂上步徐徐

春半

春半數風雨水邨增曉寒不辭蓑笠重自覺起居安隔  
霧山疑失占晴礎未乾可憐桃與李無語受摧殘

太古元西堂過萬壽謁住山肇淮海禪師并簡  
老子舊知己江湖獨爾思此行逢作者送別若為辭風  
雨過春半詩書滯海涯心心儻相印亦足慰衰遲

憶汪氏山亭舊遊并簡

因山為址屋無多中有幽人衣薜蘿自擷溪毛充野腹

頻敲牛角和漁歌  
舟車相過情難數  
姓氏長留石可磨  
遙想對牀風雨際  
一燈終夜照吟哦

古澹然老得帖  
徃長蘆不受卻歸松  
風舊寺次

社中韻

拄杖挑雲上半肩  
尋幽重到舊棲禪  
浮生多故成南北  
白髮相驚閒歲年  
房閉松聲難辨雨  
山連海脈暗通泉  
自從勇卻長蘆請  
猿鶴終宵亦穩眠

佺上人遊方

燕鴻來去盡蕭索此時心杖錫投何寺風霜別故林夜  
牀煨葉火朝谷應樵音往往長松下看山坐獨吟

送宋欽過四明郡齋

元戎招士重親臨喜遂詩書萬里心乍免客愁供帳具  
暫停遊事戟門深秋空矯首瞻魁彩夜燭憑花聽鴈音  
從此文名滄海闊好風三日到雞林

松風寺隆首座住雲際禪院

山門開望海鍾鼓動魚龍人具慈悲相秋生寂寞容隨

身惟一鉢留偈別雙松後夜橋西月支筇失所從

入京逢故人

長貧復羈旅共爽十年歡在世誰無累如君事獨難  
蹠居鄰火後多病卧春殘縱決歸山計煙蘿不療寒

下第歸故園

扁舟搖蕩水心邛幾度煙波入夢魂猿鶴認名聽號令  
漁樵執禮敘寒溫浮生多事景逾促自古求人道不尊  
莫為窮途妨曠達定應束帛賁丘園

山中

依然木石居造物任乘除  
時事今休問山中計不疎  
泉聲增雨後禽語變春初  
吟得詩名世終身甘荷鋤

山居

陰壑生暮寒白雲如炊煙  
麋鹿不識人時復近我前  
青松三四株石牀在其邊  
意思清且閒可以終餘年

前邨雨腳收斜陽挂高樹  
老貧牽牛歸頗亦有幽趣  
山風響茅屋崖月導芒屨  
平生江湖心於此謝馳騫

龍居洞雲深飛泉瀉石壁不聞耳邊喧但覺心境寂富貴由他人得失俱抱戚就能全其天山中樗與櫟

午睡不覺長童子入城回地爐散微煙煨芋已成灰獨酌無嘉賓梅花為我開須臾山月高顧影空徘徊

木落山轉空景駛寒亦蚤百草無愠容低頭就枯槁形生復形化安用置懷抱千古孔跖分所論非壽夭

古調今誰彈至樂非外假淵明愛無絃此意知者寡放鶴未歸來時倚長松下旁觀彼何人笑我衣裳野



素上人遊方

山深不可見一錫又雲飛  
梵澤通方語林霜點衲衣  
神閒生境寂思苦入吟微  
寒月空相照何人夜扣扉

自君之出矣

自君之出矣淚對花枝灑  
風窗挑夜燈心在無由寫  
自君之出矣荏苒度寒燠  
譬彼雙鯉魚書辭長在腹  
自君之出矣抱此離恨情  
春蠶不作絲纏綿過一生

松風閣

何處笙簫起半空滿山斜日動蛟龍老僧無語憑欄久  
過盡白雲千萬重

地形連斗閣連雲松籟曾經佛祖聞永夜月明人到少  
海光山色自平分

挽項大著

恥為恩門屈寧辭御史遷力陳歸老疏自盡讀書年祕  
府神遊地浮榮夢覺前世閒真不死未必屬蒼天

逢舊友生

交遊半零落身在復長貧對語寒燈盡相看白髮新兵  
興無樂土市近少閑人遥憶桃源路鳥啼花自春

潘氏梅所

種梅營數椽四壁但蕭然清帶山林氣香來筆硯邊雲  
深天向晚人立鶴趨前余亦歲寒者相從恰暮年

近買山范灣自營藏地與亡弟草塘君及外家  
墓塋悉可跂望感事述情繼有是作

外家後事淒涼甚老婦思親哭最哀今日青山留我在

他年寒日望甥來極知造物成吾志可但精靈慰夜臺  
惆悵昔時原上路獨餘宿草見春回

草塘相望隔重雲愧我為兄蚤哭君少日對吟聽夜雨  
老來無計撫孤墳泉臺冥漠惟增感人間安排已十分  
莫待他年推吉應只今友愛最先聞

十萬買山渾可事放教身死骨猶香不知筋力何年盡  
看到松杉幾尺長管郭豈能謀富貴詩書元自著興亡  
采薇歌在無人識千載清風獨首陽

依然且作住菴看茅屋三閒辦不難戶外莫容千駟馬  
客牀惟置雨蒲團深林藏虎風長怒短木支門睡自安  
西北干戈猶未已偶逢樂土度衰殘

高新甫雲崖

步步危機死不知白雲深處最平夷猿啼鶴唳非無意  
纔近高人便入詩

石窗通上人南遊并謁劉後邨

所師郊與島知己又應難羽檄邊烽急風霜歲事殘出

家忘路遠渡海識天寬  
文暢浮屠者當時亦慕韓

哭中師雪崖

衆裏知心少惟師是故人  
臨終書未答昨夜夢全真  
鶴唳渾如哭花開不似春  
近逢同住者得問病元因

方氏墓廬扁曰白雲飛處

諸峯互隱蔽一望一增悲  
觸目易成感思親無盡時  
松扉陰似雨翁仲立如癡  
出岫亦何意悠然自不知

漁邨偶題

莫道柴門窄，斷無車馬聲。  
苦吟成集少，久病見人生。  
花落寒猶在，春陰雨未成。  
漁邨名自我，鷗鷺勿相輕。

唐補闕清風亭

去國遺忠蓋，朝盤托諷深。  
因知潔已意，亦是愛君心。  
貌像意全古，子孫貧至今。  
清風如可繼，塊土已埋沈。

寄珂雪屋

積雪覆茅屋，僧居清更清。  
浮生千劫盡，長日一燈明。  
野鳥呼能下山靈，避不行。  
舊時江月在，時聽誦經聲。

本無師與槐逕弟交遊二十年矣古人謂百篇  
詩盡和一盞酒須分余於二公亦云槐逕既  
歿本無編其往來之詩號曰雲林酬倡僭述  
鄙句奉呈

中年為此別悲動故交情案上雲林卷山中風木聲  
夢回驚復喜詩在死如生幾番西郊路逢師獨自行

追惜永嘉前政和縣趙大猷時景定改元

興言民父恩猶在何故年來盡不如清節苦於為士日



歸裝輕似到官初  
月明往事尋思遍  
燈下懷人音問疎  
矯首天朝除日到  
放教田里得安居

冬日野步

樹上有禽啼似春  
聲高聲下亦何心  
幽人拄杖移時立  
句句詩中是苦吟

山中梅花

已有梅花未有詩  
青山相對動愁眉  
山翁只在山中住  
花落花開總不知

山中

長日山中坐白雲應笑人浮生塵未脫至老趣難真  
身在影猶贅年豐家自貧莫將吟事廢柳色已知春

漁父詞

白髮鬢鬆不記年扁舟泊在荻花邊天上月水中天  
夜夜煙波得意眠

只有青山可卜鄰妻兒笑語意全真休識字莫嫌貧  
方是安閑第一人

閒居言懷

老子從來不為名，放教心地到和平。  
庭前草色知春近，窗外梅花終夜明。  
紙帳夢回移月影，石溪流斷失灘聲。  
吟邊莫問紅塵事，只在茅茨亦自清。

山中遇雨

草荒泥磴滑，老病厭扶持。  
雨逐雲先後，路隨山險夷。  
天寒禽自浴，屋漏榻頻移。  
吟事愁無緒，梅花意亦悲。

湖外泛雪

雨雪連朝意未休  
支筇難步最高樓  
梅花不識春風面  
野水拍平古渡頭  
船上看山無屋礙  
塵中閱世似漚浮  
一生窮苦緣詩僻  
莫把詩窮認作愁

守歲

兒輩呼盧不計錢  
地爐圍坐笑聲喧  
老夫自算吟邊事  
栽竹移花近百篇

明日焚香叩九關  
六旬修未到清閑  
莫憐身在塵中老  
雪後騎驢亦看山

鶴雛添歲頂微紅想見瀛州路亦通昨夜柴門長半掩  
三更鼓盡叫歸籠

平日過從乏貴遊更來湖上掉扁舟除將兒女年年拜  
鄰舍相逢坐即休

柴門

春風隨處好吟事又相催觸石雲飛去呼童鶴誤來杖  
藜無疾步花地有香埃不許車塵入柴門只半開

獨宿山中

澗水松風聲不斷白雲飛上屋頭棲山中昨夜孤吟客  
只把無眠便作題

誅茅無地結菴遲借得人家近翠微何事樹禽驚不起  
也應知我久忘機

松岡過許峯送堊

此行吟更若哭舅萬山深處士花猶昔何人詩在今奉  
親無旅況對佛動慈心霜夜增寒思半牀安紙衾

宋百家詩存卷三十四